

## REGIONAL NEWS

HEADLINES:-

1. AH & Vety Dept chuan vawk pul hri ASF hrileng chu kumtin a zia chho telh telh tura beisei a ni, a ti.
2. Kolasib District chhunga TB awmlohna Village Council 14 te hnenah vawiin khan lawmpuina thilpek hlan a ni .
3. Lok Sabha inthlan thawh hnihna atana campaign vawiin tlai khan a tawp a, zirtawpniah vote thlak a ni ang.
4. President Draupadi Murmu-i chuan sik leh sa inthlak nasa siamthat kawngah ramngaw humhalh chu a pawimawh hle a ti.

&lt;&gt;&lt;&gt;&lt;&gt;

ASF

Khawlum tan leh ruahtui tlak tan tirhin ran hri chi hrang hrang a hluar thar thin angin kuminah pawh vawk pul hri African Swine Fever chuan Mizoram district thenkhat a tuam leh tawh a, AH & Vety Dept chuan ASF hrileng hi kumtin a zia chho telh telh tura beisei a ni, a ti. Vawiin khan AH & Vety Department Pu C. Lalsawivunga hovin Department Officer ten a Office Chamberah African Swine Fever chungchang a Mizoram dinhmun leh hmalak dan tur an sawi ho .

Heta tarlan anih dan chuan African Swine Fever hi kum 2021 ah Mizoram a lutchilh tan a, he natna hian state chung a chen chilh tawh a, amaherawhchu hri len hmasak ber ai chuan vawk thi leh suatte pawh a tlem chho tial tial a, hetihlai hian hmun thenkhatah hri hi a lanchhuah leh thin avangin ranvulh tute tawrhna a thleng thin a ni.

Kum 2021a ASF hrileng nemngheh anih hnuah reh taktak thei lovin kum 2022, 2023 leh 2024 ah te pawh report hi a awm chho zel a. Tunhnai a leng thar anga lang hi nikum 2023 May thla atang khan thla tin thi report hi a awm chhonzawm zel a ni tih Vety Dept hotute chuan an sawi a ni.

Pu Sawivunga chuan Mizoram chu sa a intodelh turin Department in nasa takin hma a la meka, hetihlaia African Swine Fever a leng leh thin chu pawh a tih thu a sawi a, Department a thawktu officerte theitawp chhuah zel turin a sawmin, ASF beihpui thlak naah hian mipuite tha taka Department hmalaknate tawiawm a, Sorkar dan te zawm hram hram turin a chah bawh ani.

ASF hi a enkawl na damdawi a awmluh avangin fimkhur chu invenna tha ber a ni a, Ran In intlawhpawhloh, ran damlo leh sate zawrh chhuah loh, ran thite thuk taka phum that, ran in leh a vel damdawi nen a tih thianghlim fo tur a ni.

He meeting hian mipui hnena a thara inzirtirna thatak neih leh ni se tiin a rel.

Hriat theih chinah ASF hi Aizawl, Champhai leh Saitual ah te a leng tih nemngheh tawh a ni a, tunhnaiah vawi 174 vel a thi a report a ni bawh a ni.

&lt;&gt;&lt;&gt;&lt;&gt;

CM

Vawiin khan Chief Minister Pu Lalduhoma chuan tunhnaia luidung thenfai hna thawk mek tu Save The Riparian hruaitute chu a pisaah kawmin an mamawha hman tur sum, cheng nuai 2 a hlan.

Chief Minister chuan Save The Riparian pawl hmalakna chu ropui a tih thu sawiin lawmthu a hrih a, an tha tichak turin sorkar a inpeih reng tih a hrih bawh a. Chief Minister chuan Mizorama lui te an lo thianghlim a, tui thianghlim

Mizoram a neih reng theihnana Save The Riparian te hmalakna tha taka thlawp turin Mizoram mipuite a sawm a ni.

<><><>

#### PROJECT WASTE FREE KOLASIB

District Urban Development Office, Kolasib leh Govt C. Zakhuma Higher Secondary School, Eco Club tangkawp buatsaih 'Project: Waste Free Kolasib' vawiin khan hawn a ni a, Govt. CZ HSS Eco Club te hian Kolasib Tui lakna Tuichhuahen fintu Tuilut lui hnar an thianfai a ni.

Govt. CZ HSS hian nikum khan Tuichhuahen fintu lui hnar thenfai hna hi an thawk tawh a. Bawlhhlawh Bag 100 zet an lo paih tawh a. Kumin ah a aia nasa zawk a hmalak tumin Eco Club ten ruahmanna an siam a. An ruahman dan chuan Bawlhhlawh hi bag 200 tal thenfai an tum a. School naupang 150 vel bakah Zirtirtu mi 20 an thawk chhuak a ni.

Govt. CZ HSS Principal Pu Lalnghihlova Chinzah, Principal kaihhruai a 'Project: Waste Free Kolasib' vailiamna hun ah hian Kolasib DC Pu John LT Sanga chuan CZ HSS Eco Club te hmalakna chu thil ropui tak nia a hriat thu a sawi a. He an hmalakna hian Kolasib khawpui faina kawngah, veng chung, mimal faina lama kan inenkawl na ah thu ropui tak a sawi a rin thu, a sawi. Zirlaite leh Zirtirtuten Office pawimawh tak nen a thawk ho a, khawtlang tihfai hna, kan tui in tur hnar tihfai hna thawk tura an pen chhuahna chuan thangkawk ring tak a siam zel a beisei thu a sawi bawk a ni.

<><><>

#### MLP ACT

March thla chung a MLP Act,2019 dan bawh chhia zu zuar mi 529 man an ni a, zu rui mi 53 man an ni bawk. MLP Act 2019 dan bawhchhia mantu te hi Excise & Narcotics Department leh Mizoram Police Department te an ni.

MLP Act dan phal loh zu tawlh ruk thahnem tak March thla chung khan man a ni a, heng zingah hian rakzu liters 7000 chuang leh zu bilhlai tin 5000 chuang man anih bakah dawidim kg 1 man tel a ni bawk. India ram siam zu, Mizorama dan phal loh a tawlh ruk tum zu bottle 7000 chuang leh beer cans 2000 chuang man tel a ni. March thla chung vek hian ram pawn zu siam litter 400 chuang leh beer cans 1500 chuang bakah foreign wine bottle 1000 chuang man a ni. Heng zu man bakah hian zu sakna bel 34 leh zu phurh nan a hman motor 26 man tel a ni bawk.

<><><>

#### KOLASIB WORLD TB DAY

Kolasib District chhunga TB awmlohna Village Council 14 te hnenah vawiin khan lawmpuina thilpek hlan a ni a,

Vawiin khan Kolasib-a I&PR Conference Hall-ah World Tuberculosis Day hman a ni a, DC Pu John LT Sanga chuan a hmanpui a. He hunah hian Pu R.Lalrammuana, Supervisor, DOT Plus TB HIV chuan TB natna, a lan chhuah dan leh enkawl na kalpui dan a tarlang a. Village Council-te TB Free Village a puan theih tur a tehfung hrang hrangte tarlan niin TB natna avanga enkawl mek ten eitur tha an dawn theih nan a duh apiang tan Nikshay Mitra kaltlangin, tanpuina thla 6 chung, thla tin 700 an pek theih thu a sawi a. Deputy Commissioner, Kolasib pawh hian vawiin hian TB natna veite tanpui nan Nikshay Mitra ni turin Sr. CMO Dr. RK Lalthlamuana hnen ah tanpuina a hlan nghal bawk a ni.

Kolasib district a Village council 56 zingah vawiin hian Thingdawl RD block hnuai a Village Council paruk, Zanlawn, Serkhan, N.Chaltlang-I, N.Chaltlang- II, Bukpui leh Thingthelh VC te chu TB Free Village ah puan an ni a. Bilkhawthlir RD block

hnuai a Village Council pariat, Buhchangphai, Saihapui K, Pangbalkawn, Meidum, Phaisen, Saihapui V, N.Chawnpui leh Saipum VC te chu TB Free Village ah puan an ni. Kolasib district chung a Village Council dangte pawh TB Free Village-a puan an nih thuai theih nan hmalak mek a ni bawk.

<><><>

#### KHAWZAWL BLOOD DONATION

Khawzawl Vengthar Branch YMA in an Branch kum 50 tlin lawmna an neih mekah wawiin khan a thlawn a thisen pek runpui an buatsaih a, thisen unit 74 an pe.

Wawiin thisen pek runpui ah hian Champhai District Hospital Blood Bank atangin Dr. Lalnuntluanga hovin mi 8 an thawk chhuak a. Vengthar YMA Member te bakah Khawzawl khawpui chung veng dang atangte in mi tlawmngate an thawk chhuak a, thisen petute hi mipa 60 leh hmeichhia 14 an ni.

Khawzawl Vengthar Branch YMA hian an Branch Golden Jubilee lawmna pual hian kumtir atangin kumin kum tawp thleng hian Programme an buatsaih dawn a, Marathon Race te, Mizo infiamna hmanga intihsiakna te, YMA Chhang Sports te an buatsaih tawh a ni.

<><><>

#### LOK SABHA 2<sup>ND</sup> PHASE

Lok Sabha inthlan thawh hnihna atana campaign wawiin tlai khan a tawp a, zirtawpniah vote thlak a ni ang. Inthlan thawh hnihnaah hian Parliament constituency 89 ah vote thlak tur a ni a. State 13 leh Union Territory pakhatath vote thlak a ni dawn a. Kerala-ah seat 20, Karnataka-a seat 28 awm atangin seat 14, Rajasthan-a seat 25 atangin seat 13, Uttar Pradesh leh Maharashtra ah seat 8 ve ve, Madhya Pradesh ah seat 6, Assam leh Bihar ah seat 5 ve ve, West Bengal leh Chhattisgarh ah seat 3 ve ve leh Tripura leh Jammu and Kashmir-ah seat khat ve veah inthlan a ni ang. Hei bakah hain Outer Manipur parliamentary constituency chhunga Assembly bial 13-ah vote thlak a ni bawk ang.

<><><>

#### CAMPAIGN

Congress hruaitu senior Rahul Gandhi chuan an party manifesto chuan Prime Minister Narendra Modia a tibuai hle a ti. Wawiina Congress buatsaih Social Justice Conclave ah he thu hi sawiin Pu Gandhi chuan an party-in rampum siamtha thei tur manifesto an tlangzarh khan Prime Minister Modi-a chu a phang hle a ti a. Pu Modia'n Congress Manifesto a sawisel chu chhangletin Rahul Gandhi-a mipuite hnenah ram hausakna an hlan let leh dawn ani a ti. Tun thla tir khan Congress chuan an manifesto 'Nyay Patra' hi an tlangzarh a ni.

Hetihlai hian BJP hruaitu leh Union Home Minister Amit Shah-a chuan Kerala-a a campaign naah Congress leh Communist party te chu ram hmelma te hnen atanga puihna dawng angin a puh. Pu Shaha chuan PFI leh SDPI te hnen atangin heng party pahnihte hian thlawpna an dawng tih sawiin Kerala-ah firfiaka chetna an tipunlun a ti a. BJP sawrkar hnuaiyah chuan PFI te chu an chet vel phal a ni lo ang a ti bawk.

<><><>

## IFS

President Draupadi Murmu-i chuan sik leh sa inthlak nasa siamthat kawngah ramngaw humhalh chu a pawimawh hle a ti. Vawiina Dehradun-a Forest Research Institute-a Indian Forest Service Probationers-te convocation a hmanpuinaah he thu hi sawiin Pi Murmu-i chuan mihringten ramngaw pawimawhna ngaihthahin an thiat mek a ti a. President chuan mihringte chu he khawvel neitu an ni lova, a humhimtu zawk a ni an ti.

Vawiina officer tharte chu ramngaw siam, humhalh leh tihpuitlin kawngah theihtawp chhuah turin a chah a ni.

He hunh hian Indira Gandhi National Forest Academy atangin probationers 99 bakah Bhutan atanga lo kal officer training lai mi ten 2022-24 course hi an zir zo a.

Madhya Pradesh atangin mi 15 awmin an tam ber a, Uttarakhand-in pahnih an nei bawk a ni.

<><><>